

lis Gnovis

■ GRADISCJE. «Preson etniche»

«O bramìn di vivi intune tiere dulà che nissune persone no pues jessi sierade o parade vie par colpe de sò divignince o de sò cundizion economiche. No sarin mai plui e mai altri complicis di un «Lager» dongje cjase nestre. I «Lager» a son lis fondis di un mont cence justizie, plen di asse e di repression violente»: no mòlin di bati e di ribati la sò denunzie i ativiscj de «Assemblee No Cpr - No Confins», ch'è opere a Gradiscje Imperiâl par no ch'al vierzi il «Cpr» progjetât par dâi la volte al «Cara», logât li de viere caserme «Polonio». I «Cpr» – a contestin chei de Assemblee – a son «presons etnichis», dulà che lis personis a son «internadis (pal fat ch'â finissin intune preson cence une sentence penâl)» e dulà che si prepare la «deportazion» tai País di divignince.

■ UDIN. Lûc virtuâl pe «Buteghe dal mont»

Dopo di vè vierzût la gnove cjase di modon, tal Borc di Puscuel, la «Buteghe dal mont» di Udin e à screât ancje la gnove cjase virtuâl par dâi un sburt ancjemò plui



fuart al «cumierç just e solidari». Tal gnûf lûc internet, a la direzion www.bottegadelmondo.net, si podarà fâ compris, decidint se recuperà lis marcjanziis (mangjativis o prodots dal artesanât di dut il mont) te Buteghe o se fâses consegnâ, ogni vinars, dentri tai confins dal teritori comunâl. Il servizi informatic al propon ancje informazions e gnovis sul cumierç just e solidari e sun dutis lis Buteghis de Cooperative: Codroip, Glemone, Spilimberc e Tumieç.

■ UDIN. Crisi climatiche e scuele

Biel ch'è tire dilunc la mobilitazion dai students cuintri dai mudaments climatics, ancje tal indoman dal cuart «Siopar mondiâl pal avignî» dai 29 di Novembar, si prepare un altri pas impuartant pal infuortament dai «Fridays for Future» de Furlanie. Miercus ai 11 di Dicembar, a 17.30 li dal circol udinês di «Legambiente» (logât te viere caserme «Osoppo» di strade Brigata Re), si daran dongje i insegnants ch'â smirin di meti sù il grop «Teachers For Future Fvg». Fra i obietifs de riunion, a son la difusion tes scuelis la «Declarazion di emergjence climatiche» e la difusion dal cors di formazion «on line» sui mudaments climatics acreditât dal «Onu».

■ SPILIMBERC. Aministradôrs a scuele

Al va indevant il cors par aministradôrs e dipendents publics sui compits dai Ents locâi te protezion dal patrimoni culturâl des minorancis linguistichis, inmaneât de Assemblee de Comunitât linguistiche furlane e dal Centri interdipartimentâl pal svilup de lenghe e de culture dal Friûl dal Ateneu furlan. Il program des lezioni al previôt apontaments joibe ai 5 di Dicembar, a 17 a Spilimberc (Palaç Dis ore); vinars ai 6 a 18, a Palme (Municipi); joibe ai 12, a 18 a Caprive (Centri Civic); e vinars ai 13, a 18 a Tumieç (Municipi). Informazions par arlêfs gnûfs: 0432 556480 / 0432 556486 / cirf@uniud.it.

Joibe 5	S. Crispine	Lunis 9	S. Sir
Vinars 6	S. Nicolau vescul	Martars 10	La Madone di Laurêt
Sabide 7	S. Ambrôs	Miercus 11	S. Damâs
Domenie 8	Imacolade Concezion	Il timp	Zornadis fredis.



Il soreli
Ai 5 al iève aes 7.33
e al va a mont aes 16.22.



La lune
Ai 4 Prin cuart.


Il proverbi
No covente pandii al gjat
la puarte de cjanive.

Lis voris dal mès
Se nol ves di jessi mase frêt o podês finî
di svangjâ e netâ il teren fin sot lis vits.

Leç 168: «Jevait sù!»

Une clamade par dutis lis Comunitâts

Nol risulte ch'al sedi informât fûr par fûr su la situazion furlane, ni su la sudizion o ben su la sflacie di tantis Comunitâts e nancje su la prepotence di putrops sindics e di tancj funzionaris publics nostrans, cun dut a chel la clamade infogade che Giorgio Pagliari al à fat a Trent, ai 22 di Novembar, intant de XXV «Riunion sientifiche» dal «Centri studi e documentazion sui Demanis civics e su lis Proprietâts coletivis», e à parût dreçade in plen a la int di For Disot e a chei di Nearêt di Cuar, a la Comunitât di Culine e a chei di Clavaais e di Liariis, ma ancje a la int di Priole e di Noiaris, di Jamian di Dobardò, di Bicinins, di Muçane e di Romans di Vildivar, di Mueç, di Cjavaç, di Fielis e di Formeàs, di Tamau/Tischlbong, di Grac, di Val e Rualp e dal Pulfar, di Davian, di Budoie e di Tramonç Disore e Disot, e a lis Comunitâts di Glemone e di Ospedâl Piçul... Invidât a fevelâ su la «gnove dimension legislative dai Dominis coletifs e su lis sôs perspeticivis», daspò de Leç statâl 168 dal 2017, devant dal sotpresident de Cort costituzionâl, Aldo Carosi, e dal president emerit, Paolo Grossi, e di face di une schirie di studiâts e di aministradôrs di Proprietâts coletivis di ogni bande da l'Italie, Pagliari, ch'al è professôr di Dirit amministratîf da l'Universitât di Parme ma ch'al à stât ancje il senatôr ch'al à firmât le «Norme in materia di domini colletivi» (fatis buinis a l'unanimitât, 2 agns indaûr, dal Parlament), al à sclarit che i «Dominis coletifs» a son proprietât des Comunitâts. E al à ancje marcât che la «pretese dai Ents locâi di considerâju tant che une sò proprietât disponibil o tant che un



In vert, i Bens coletifs proprietât des Comunitâts di Glemone e di Ospedâl

Giorgio Pagliari: «I Bens coletifs a son proprietât des Comunitâts»

patrimoni comunâl e à, te Leç, un ostacul insuperabil». «Ancje dulà ch'al è il Comun ch'al gjestis chei Bens – al à motivât Pagliari – l'Ent locâl al è obleât a gjestiju tal respitet des regulis previodudis de Leç e no come ch'â fossin un Ben dal patrimoni comunâl». Ma se chest al è il struc e il fin des «Norme in materia di domini colletivi», ch'â àn ribaltât l'implant des regulis di prin dal 2017, scancelant une filosofie licuidatorie lade indevant dai agns de ditature fassiste al di di vuè, al vûl prin di dut che lis Comunitâts a vebin une cussiente gnove e che si cjamin sù fin da pit lis sôs responsabilitâts. Giorgio Pagliari, sun chest cont, al à dit peraulis fuartis. «Cjalait – ur à dit al popul dai Bens coletifs – che la Leç 168/2017 ur dis ai components des Proprietâts coletivis: o sês voltris i proprietaris di chei Bens. Jevait sù. Rivendicait la proprietât. Metêt sù l'Ent di gestion ch'al à di rapresentâus. Costituît la personalitât juridiche e recuperait la disponibilitât e la proprietât dai Bens».

Di chest pont di viste, al è lât indevant il relatôr, al è pacific che «la Leç ur da ai proprietaris l'imprest par protezi la sò proprietât. Ma in chel fratimp ur met sù la cjame di une grande responsabilitât, parcè che in zornade di vuè o vin l'imprest par finile di lamentâsi dai abûs dai Ents teritoriâi e par recuperâ la disponibilitât plene dai Bens coletifs e par gjestiju cu la determinazion juste».

Mario Zili

Udin, si cjante la Messe par furlan

A Udin, la Messe par furlan e ven cjantade sabide ai 7 di Dicembar, a 18, li de capele «de Puritât», daprûf dal domo (cun Radio Spazio che le trasmet sul moment). E compagnarà la celebrazion la corâl «Amis dal Malignani» di Udin. Al cjantarà messe pre Giovanni Gabassi, plevan di Remanzâs.

Peraulis in dismentie par cure di Mario Martinis

❖ FRANT

agg. = schiacciato
(dal participio passato fractus del latino frangere "rompere")
Lis nolis a vegnin frantis par fâ la creme.
Le nocchie sono schiacciate per fare la crema.

❖ FRANZI

v. = frangere, frantumare
(dal verbo latino frangere "rompere")
Âstu frant lis coculis?
Hai frantumato le noci?

❖ FRAPE

s.f. = piega, grinza, gualcitura
(di origine oscura, il termine è da confrontare con il medievale frapperius "trinciante di panni"; la parola è attestata nell'italiano del XVI secolo nell'accezione di "frangia" o nel significato traslato di "nomulla")
Il vistit i cole a pinel, no i fâs nancje une frape.
Il vestito le cade a pennello, non le fa neppure una piega.

❖ FREÂ

v. = sfregare, lucidare, strofinare, stropicciare
(voce di origine settentrionale, da confrontare con il latino fricare, da friare "sminuzzare")
No sta freâti tor dal mûr cul vistit gnûf.
Non strofinarti sul muro con il vestito nuovo.

❖ FREANDE

s.f. = massaggio curativo, fregazione
(dal verbo freâ "sfregare, lucidare, strofinare")
Une freande e sta ben a ducj.
Un massaggio curativo fa bene a tutti.

❖ FREGHENIN

s.m. = briciolino (diminutivo)
(probabilmente nasce da un influsso delle parole venete fregheta e fregolin designato per indicare qualcosa di piccolo sul termine friulano fregul)
Nome un freghenin, gno ninin.
Un briciolino soltanto, mio caro.